



ella ligia naziunala A, la pli aulta ligia svizra. El miez da quella ei la Tuatschina Alicia Beer (15). Ella ei buca mo ina petga per la Voluntaria Trun, mobein s'auda era denter las meglieras tiraduras da sia vegliadetgna en Svizra. La stad vegnenta tschenta ella ils binaris per ina carriera da tir professionala.

Hans Huonder/FMR

Ils 10 da fevrer 2024 ei staus in di historic per la Societad da tir Voluntaria Trun. Cun si'equipa da tir cun buis sin 10 meters ha ella numnadamein contonschiu la promoziun ella ligia naziunala A. Quei ei la pli aulta ligia da tir svizra. Avon rodund 20 onns ei l'anteriura casa da tir da 300 meters a Pustget vegnida midada en ina localitad pil tir da 10 meters. La societad ei ida cul temps e ha installau tschun schibas electronicas el stan, leu nua che la societad ha organisau onns alla liunga denter auter la «Feldmeisterschaft». A quei tir campester obtenevan gruppas participontas in'ura. Tier bein enqual tiradur vegn quella aunc adina a pender en stiva ni en cuschina. Igl ei ina regurdientscha dil temps ch'il tir da 300 meters era signaus da buis d'assagl 57 e carabina. Sittar a Pustget era in'aventura – ed in'aventura ei quei era oz per las tiraduras ed ils tiradurs da sport (mira era box).

La pli giuvna dall'equipa

L'emprema equipa dalla Societad da tir Voluntaria Trun consista surtut da tiraduras e tiradurs da Trun. Mo buca mo. Ella vegn rinforzada d'entginas fermas tiraduras d'ordeifer. Ina da quellas ei Alicia Beer da Rueras. El final dalla promoziun ha ella sittau il tierz meglier resultat dall'equipa. Meglieras ein sulettamein aunc la commembra dall'equipa naziunala Annina Tomaschett e Martina Herrli stadas. Tut en tut ha ella sittau il quart meglier resultat da tuts 32 tiradurs ch'ei separicipai alla runda finala dalla promoziun, respectivamein relegaziun per la ligia naziunala A. «Ei fa secapescha grond plascher da haver contonschiu la promoziun», di Alicia Beer. Avon biebein tschun onns ha il bab Simon surplidau ella da far in fuffergnadi el stan da sittar a Trun. Ed igl ei stau carezia sill'emprema egliada e dapi lu ei la giuvna tiradura che cumplenescha il mars ils 16 onns, regularmein el stan da sittar. «Igl ei in sport che pretenda absoluta exactadad.

Leutier s'auda era ina buna constellaziun mentala», di Alicia Beer e puntuescha: «Jeu mirel era fetg bugen co ils auters siettan.»

450 siets d'exercezi per jamna

Treis ga ad in'jamna exercitescha Alicia Beer, mintga ga avisescha ella rodund 150 ga il 10,9, il pli ault diember da puncts contonschibel sin 10 meters. «Sch'jeu sietel buc a Trun, lu el stan da sittar da 10 meters a Sedrun», di la sportista ambiziusa. Ella ei commembra dil cader regional da Swiss Shooting, l'associaziun svizra da tir. Per quei motiv serenda ella savens era a Filzbach per sittar leu cullas meglieras junioras da si'annada dalla Svizra orientala. Trenada vegn ella leu da negin auter che d' Andri Tomaschett da Trun, in collega d'equipa da Trun. «Igl ei secapescha era bi sche nus savein tschintschar romontsch in cun l'auter», di ella riend. Els tirs dils davos tschun onns sin plaun cantunal eis ella pli u meins adina sortida sco victura da sia vegliadetgna, leutier eis ella stada igl onn vargau tiarza al campinadi svizzer silla distanza da 10 sco da 50 meters.

Scola e trenament a Biel

La stad vegnenta entscheiva Alicia Beer la scola mercantila da talents a Biel. Miez dil temps eis ella lu en stanza da scola, tschei miez el stan da sittar. Igl emprendissadi cuoza quater onns ed ei aschidadir l'emprema etappa dad ina carriera professiunala da tir: «Leu sai jeu trenar sil pli ault nivel. Jeu selegrel fetg sin quei temps.» E tgisà, forsa ei quei era gest l'entschatta d'ina gronda carriera internaziunala. «L'olimpiada ei secapescha in grond siemi», di Alicia Beer. Nunrealistic ei quei buc, pertgei cun Nina Christen ha ina Svizra schizun contonschiu la medaglia d'aur igl onn 2021 el match da treis posiziuns e quella da bronz culla buis d'aria als Giugs olimpics a Tokio. E daco duess quei buca reussir ad Alicia Beer che sietta dil reminent ella vestgadira da tir che s'udeva avon ad Annina Tomaschett e che lezza haveva retschiet da Nina Christen. Sia proxima gronda finamira ei il campinadi svizzer ils 2 da mars 2024 a Berna, respectivamein il campinadi svizzer da gruppas questa fin d'jamna.

«Pli bugen ballapei che tir»

Che la famiglia d' Onna e Simon Beer da Rueras viva il mument duront il temps liber surtut pil sport muossa er igl exempel dalla feglia giuvna Liana (12). Igl unviern eis ella da cattar surtut el stan da sittar, dalla primavera entochen igl atun denton sil plaz da ballapei. Ella ei numnadamein commembra ell'equipa da junioras dalla Surselva. El stan da sittar muossa Liana Beer prestaziuns fetg constantas sin ault nivel per sia vegliadetgna. Mo tuttina di ella: «Jeu dun pli bugen ballapei. El ballapei sun jeu pli libra, da sittar survegnel jeu mal ils peis ed il dies da star agradsì.» Duas ga ha ella gia gudignau la concorrenza dil di svizzer da tir dils giuvenils da sia categoria. Las premissas per ina carriera da tir fussen era dadas tier ella, mo Liana Beer di: «Mira finamira ei da dar ballapei, in di forsa schizun tier Real Madrid ni Barcelona.» Pustget ei pia buca mo la tgina da tiraduras e tiradurs d'elita, mobein era da giugaduras e giugadurs da ballapei. La fin finala ei la piazza da ballapei buca lunsch naven dalla casa da tir e da Trun ei bein enqual giugadur da ballapei da Trun staus da veser en ligias pli aultas, per exempel Erni Maissen.

In laud survegnan omisduas tiraduras giuvnas dil reminent da lur trenader Baseli Tomaschett : «Omisduas reliseschan fetg spert co ellas san semigliurar. La voluntad d'esser perfetgas ei nunsurveiseivla.» Per el ed ils auters responsabels dalla Societad da tir Voluntaria Trun ein ils success dils davos onns la pagaglia per gronda e buna lavur. (fmr/hh)